



Dîs.

Un numar, une sigurece, un principi di vite, une ossession.

No podin sucedi robis brutis se tu sês fedêl. A sucedaran se no tu lu rispjetis.

Dîs a àn di jessi lis robis che tu metîs tal carel a ogni spese fate. Dîs i minûts di cuei la pastesute e chei doprâts par cagâ. Dîs lis pagjinis di lei in dî o pûr dîs i dîs par finî un libri.

Dîs i scjalins di fâ, e magari tu scugnîs saltâ un o fâlu dôs voltis. Dîs i pârs di mudantis tal scansel, dîs lis cjamesis picjadis, dîs i bêçs tal tacuin o i macarons tal plat.

No tu ti visis cuant che tu âs tacât. Forsit di piçul, sui dêts de man, forsit cuant che tu jeris za canai e tu contavis penis e lapis tal astuç. Tu ti visis di vêt robadis o regaladis, par che il cont al torni.

E nol è facil sei un ossessîf compulsîf.

I vûl sistematicitât, calcul, braûre. I vûl sei babio par proviodi i bêçs dal rest de camarele o i pîts di savôrs che tal ort a cjaparàn. I vûl coraç a butâ vie alc che tu i tegnîs o proviodisi di alc che no ti covente.

E no tu cjalis in muse leç, morâl, bonstâ. No tu cjalis in muse a di nissun, e in pôcs a capissin.

No ti capîs Cornelio, che ti invide a bevi *un tai* - e no dîs - e alore lui ti met devant une tace vueide, par che *un e zero a fasìn dîs*.

No ti capîs Colastiche, che ti coione parcè che i garofui no si regalin in numar pari e dopo si ufint parcè che tu i dividis in doi il mac, che tant *Ve chi, fantate, cinc e cinc!*

No ti capissin cuant che tu tuchis te puarte cussì a lunc, cuant che tu fasis cetantis manovris par parcâ la machine o tu butis tes scovacis dôs caramelis dal pacut.

Tu contis disperât lis stelis, la gnot, dîs ae volte.

Se almancul ti fos capitât un altri numar, tu pensis. Un numar plui piçul, plui gjestibil.

Ma ti è capitât il dîs e aromai tu i vueilis ben. Da rest, ti podeve lâ ancje piês.

A Tarcisio, par disi une, i è capitât pi greco!

di Rafaêl Serafin